



Inatsisartut

Aningaasaqarnermut Akileraartarnermullu

Ataatsimiititaliaq

Finans- og Skatteudvalget

Ulloq/Dato: 18. november 2011

J.nr.: 01.31.06/11-00554

Aningaasaqarnermut Naalakkersuisoq

Aningaasaqarnermut Akileraartarnermullu Ataatsimiititaliap suliaq nr. 01.31.06/11-00554 pillugu tallimangornermi ulloq 18. oktober 2011 aalajangiineranik Naalakkersuisunut ilisimatitsineq.

Qaqortumi ilinniartut inaannik sanaartornissamut atugassanngortitsinissaq

Naalakkersuisut inassutigaaat

- kontomi pingaarnermi 84.40.15-imi, Ilinniartut inaannik sanaartornermut tunngasumi, suliassamut nr. 996.52.055-mut, Ilinniartut inaannik pilersaarusiornermut sanaartornermullu 2010-mut tunngasumi, aningaasaliissutit 4,0 mio. koruuninik ikilineqassasut, suliassamut nr. 996.52.056-imut, Ilinniartut inaannik pilersaarusiornermut sanaartornermullu 2011-mut tunngasumi, aningaasaliissutit 16,25 mio. koruuninik ikilineqassasut aamma suliassamut 020.52.045-mut, Qaqortumi ilinniartut inaannik sanaartornermut 2009-2011-mut tunngasumut, aningaasaliissutit 2011-mi 20,25 mio. koruuninik amerlineqassasut.

Aningaasaqarnermut Ataatsimiititaliap oqaaseqaatai

Aningaasaliissuteqarnissamik pisariaqartitsineq qinnuteqaammi matumani ima nassuiarneqarpoq:

” Qaqortumi ilinniartut inaannik saniatigut pisariaqartitanik naatsorsuineri kingullermi paasineqarpoq, inissat 85-inik ilaneqarnissaat pisariaqartinneqarpoq. Tamanna ilaatigut illoqarfinni sumiiffinni assigiinngitsuni attartornikkut naammassineqassaaq. Tamatumani ingerlatsineri aningaasartuutissat amerlapput, aammalu ukiuni tulliuttuni amerlanerulissallutik.

Ilinniartunut inissiaqarfittut neqeroorutigineqarpoq pingasunik quleriiusoq 2000 m²-t missaannik angissuseqarpoq, aammalu inissiat 50-iupput, taakkununnga nakkutilliisumut inissiaq aammalu inini allerni innarluutilinnut inissiat marlunnik initallit tallimat ilaallutik. Ilinniartunut inissiaqarfik nutaaliaavoq, inissiallu tamarmik namminerisaminnik uffarfeqarput igaffeeraqarlutillu. Nammineerluni aallartartunik milluaasersugaapput. Majuartarfinnut atasumik kivittaasigaavoq.

Imeqarfiup eqqaani killeqarfik mattussiffiusoq pissutigalugu ilinniartunut inissiaqarfik Qaavani sanaartorfimmi Ilinniarfissuarmut aamma Niuernermut Ilinniarfimmu ungasingaatsiarpoq.”

Sanaartugassatut pilersaarut taanna Aningaasaqarnermut Akileraartarnermullu Ataatsimiititaliamit ajoriffissaqartinneqanngilaq.

Sanaartugassatut pilersaarutip matuma aatsaat ulloq 21. september 2011-mi suliariumannittussarsiuunneqarnera naammaginangimmat ataatsimiititaliamit

oqaatigineqassaaq. Taamaalillunilu 2011-mi aningaasanut inatsisissatut siunnersuutip aappassaaneerreqarnissaanut 4. november 2011-mi isumaliutissiisummini taamani Aningaasaqarnermut Ataatsimiititaliaasoq ima allammat ataatsimiititaliamit innersuussutigineqassaaq:

” Kaammattuut nr. 6

*Ilinniartut inaannik sanaartornissamut aningaasanut inatsisissatut siunnersuummi aningaasaliussat atugassiissutigineqanngitsut atugassiissutigineqarnissaannik sulineq Ineqarnermut Attaveqarnermullu Naalakkersuisoqarfimmit aammalu Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoqarfimmit siuarterujussuarneqarnissaat Aningaasaqarnermut Ataatsimiititaliamit **kaammattuutigineqarpoq**. Tamatumanili siunertaassanngilaq aningaasat atorreqaratik Sanaartornermut Iluarsaanermullu Aningaasaateqarfimmi uninngaannarnissaat, akerlianilli siunertarineqassalluni sanaartugassat pisariaqartut sapinngisamik piaarnerpaamik allartinneqarnissaat.”*

Tamatuma kingorna maanna ukioq ataaseq sinnerlugu ingerlareerpoq, tamannalu Aningaasaqarnermut Ataatsimiititaliap kaammattuuteqarnerani siunertarineqartumut naapertuutinngilluinnartutut oqaatigineqartariaqarpoq!

Tamatuma saniatigut aningaasat qinnuteqaammi ilaatinneqartut ilarpassuisa 2011-mi *atorneqanngitsoornissaat*, aatsaalli ukiuni aningaasaliiffiusussani aggersuni atorneqarnissaat ilimagineqarlunnartariaqarpoq. Tamannattaq assorsuaq naammaginangilluinnartutut isigineqartariaqarpoq, tamatumanilu isumaliutissiisummi siuliani taaneqartumi kaammattuut nr. 4 ima oqaasertaqartoq ataatsimiititaliamit innersuussutigineqartariaqarpoq:

” Kaammattuut nr. 4

*Aningaasat Sanaartugassanut Iluarsagassanullu Aningaasaateqarfimmi atorreqaratik uninngaannartussaasut ilisimagaluarlugu aningaasanik qinnuteqartoqartaqqunagu sanaartugassanut aningaasaliissutinik atuinissamik **piviusorsiortumik** missingersuusiortarnissamik qulakkeerinninniarnerminnik Naalakkersuisut ingerlatsiinnarnissaat Aningaasaqarnermut Ataatsimiititaliamit **kaammattuutigineqarpoq**. Minnerunngitsumik aningaasat Iluarsaanermullu Aningaasaateqarfimmi uninngasuutigineqarnissaat siunertaralugu allaffissornikkut kinguaattoornermik pissuteqarluni ukiup naalernerani sanaartugassanut aningaasaliissutit atugassanngortinneqarnissaat qinnuteqaatigineqartariaqanngilaq.”*

Ataatsimut isigalugu Aningaasaqarnermut Akileraartarnermullu Ataatsimiititaliap aammaarluni **sakkortuumik kaammattuutigissavaa** siusinnerusukkut kaammattuutigineqartut siuliani allassimasut Naalakkersuisunit malitseqartinneqassasut.

Aningaasaqarnermut Ataatsimiititaliap aalajangiinera

Siuliani allassimasutut paasinnilluni Naalakkersuisut inassuteqaataat Aningaasaqarnermut Ataatsimiititaliamit **akuersissutigineqarput**.

Aningaasaqarnermut Ataatsimiititaliap sinnerlugu

Andreas Uldum
Siulittaasoq